

ODLUKU**O PREKRŠAJIMA PROTIV JAVNOG REDA I MIRA****I - OPĆE ODREDBE**

Član 1.

Predmet

Odlukom o prekršajima protiv javnog reda i mira (u daljem tekstu: Odluka) utvrđuju se prekršaji protiv javnog reda i mira na području Općine Trnovo (u daljem tekstu: Općina) i prekršajne sankcije koje se izriču počiniocima prekršaja, a koji nisu propisani Zakonom o prekršajima protiv javnog reda i mira.

Član 2.

Prekršaji protiv javnog reda i mira

Prekršaji protiv javnog reda i mira, u smislu odredaba ove Odluke, su djela kojima se na nedozvoljen način remeti mir, rad i normalan način života građana, stvara neraspoloženje, uznemirenost ili ometa kretanje građana na ulicama i drugim javnim mjestima ili se na drugi način narušava javni red i mir građana utvrđen ovom Odlukom.

Član 3.

Prekršajne sankcije

Za prekršaje protiv javnog reda i mira, u skladu sa ovom Odlukom, može se izreći:

- novčana kazna i
- zaštitna mjera privremenog oduzimanja predmeta.

Član 4.

Značenje izraza

Pojedini izrazi upotrijebljeni u ovoj Odluci imaju sljedeće značenje:

- a) "Javno mjesto" u smislu odredaba ove Odluke je javno mjesto definisano članom 4. Zakona o prekršajima protiv javnog reda i mira ("Službene novine Kantona Sarajevo", broj 18/07, 7/08 i 34/20) i
- b) "Vraćanje" je korištenje lakovjernosti osobe, najčešće proricanjem sudbine, odnosno budućnosti koje se odvija za novac ili drugu protivuslugu.

**II - PREKRŠAJI PROTIV JAVNOG REDA I MIRA I
PREKRŠAJNE SANKCIJE**

Član 5.

Prekršaji i novčane kazne za fizička lica

(1) Novčanom kaznom od 100,00 KM kaznit će se za prekršaj

- a) ko uznemirava stanare upotrebom telefona, zvonceta ili interfona ili kucanjem na vrata stana bez potrebe, kao i radi prodaje robe, gatanja ili proricanja sudbine ili pružanja usluga koje nisu ugovorene ili naručene,
- b) ko pršće prolaznike vodom prilikom pranja ulica, pločnika ili dvorišta, zalijevanja vrtova ili travnjaka ili od vozila u pokretu,
- c) ko pere motorna vozila ili prosipa motorna ulja na mjestu gdje to nije predviđeno,
- d) ko pere čilime i slične predmete ispred zgrada ili ko istresa tepihe, jorgane, posteljine, stolnjake i druge predmeta i otpatke sa balkona i terasa stambenih zgrada,
- e) ko sapira balkone vodom koja se sliva niz zgradu, odnosno balkone,
- f) ko parkira motorno vozilo uz rijeke, vodotoke i zelene površine bez odobrenja nadležnog organa,

- g) ko vrši organizovanu obuku skijanja mimo prostora predviđenog za isto bez odobrenja nadležnog organa,
- h) ko koristi sanke ili motorne sanke u zoni skijaških staza, suprotno odredbama Zakona o javnim skijalištima Kantona Sarajevo ("Službene novine Kantona Sarajevo", broj 54/12),
- i) ko koristi motorna vozila (mopedi, laki motocikli, četverocikli, laki četverocikli, motocikli, kvadovi, motorne sanke, ATV, terenska motorna vozila i slično) van prostora predviđenog za saobraćaj motornih vozila bez odobrenja nadležnih organa,
- j) ko prodaje novine ispred i na raskrsnicama ili ko se bespotrebno zadržava na raskrsnicama ili uz saobraćajnice na način da ometa učesnike u saobraćaju,
- k) ko cijepa drva i ugalj u haustorima stambenih zgrada.

(2) Novčanom kaznom od 150,00 KM do 450,00 KM kaznit će se za prekršaj:

- a) ko baca na prolaznike i vozila led ili snijeg savijen u grudve, kamenje ili druge predmete ili ko baca na prolaznike predmete, hranu ili prosipa tekućinu iz zgrada ili ograđenih prostora,
- b) ko pere prozore ili druga stakla na vozilima ispred i na raskrsnicama,
- c) ko piše grafito po fasadama i ulazima zgrada, javnim prevoznim sredstvima, spomenicima, potpornim zidovima, reklamnim panoima i sl.,
- d) ko lomi ili na drugi način oštećuje ili uništava sadnice i rasad na javnim površinama,
- e) ko se vješa ili penje na sredstva javnog gradskog saobraćaja, ili ko iskače, nzlazi ili se naginje iz sredstava javnog gradskog saobraćaja u pokretu,
- f) ko pomjera kontejnere za smeće sa mjesta koja su utvrđena odlukom nadležnog organa ili ko odlaže smeće mimo kontejnera ili ko pali vatru u i oko kontejnera za smeće ili ko ošteti kontejner za smeće,
- g) ko loži vatru bez nadzora na otvorenom prostoru prilikom čišćenja bašta i njiva (spaljivanje lišća, trava, granja i slično), ili ko koristi roštilj na drva, ugalj, električnu energiju ili plinske uređaje na otvorenom na području Babinog dola na Bjelašnici,
- h) ko ulazi ili se okuplja u napuštenim privatnim ili državnim objektima,
- i) ko šutiranjem lopte u fasade zgrada, reklame, panoe, ograde i u vozila u mirovanju uznemirava stanare i prolaznike,
- j) ko u svojstvu vlasnika, zakupca ili korisnika stambenog objekta, porodične zgrade, zgrade kolektivnog stanovanja, poslovnog objekta i zemljišta, odlaže bilo koju vrstu otpada, ambalažu bez odobrenja, dotrajale stvari, napuštena, neregistrovana, havarisana vozila, dijelove vozila ili na drugi način drži dvorište, vrtove, voćnjake, ogradu, poslovni krug, pripadajuće ili dijelove trotoara, ulaza i prilaza u objekte, nečistim i zapuštenim,
- k) ko kao učesnik u saobraćaju iz vozila u stanju kretanja ili mirovanja izbacuje otpad (opuške, razne ambalaže, kese, papir, flaše i sl.),

- l) ko izvodi pse u šetnju bez zaštitne brnjice i povodca i ko ne veže propisno životinju/kućnog ljubimca i time uzrokuje uznemirenje i strah kod drugih lica,
- lj) ko ometa službena lica prilikom uklanjanja pasa lualica sa ulica,
- m) ko postupa sa životinjama na način kojim izaziva uznemirenje ili negodovanje građana, ili ko ne ističe upozorenja na opasnost na ulazu u zatvoreno dvorište ili drugi određeni prostor gdje su smještene opasne životinje ili ko uvodi životinje u prodavnice i slične objekte,
- n) ko kupu životinje ili ne ukloni nečistoće iza životinja na javnom mjestu, i
- o) ko surovo postupa sa životinjama, izaziva ih ili ih podstiče na borbu, ili ko kolje životinje na javnom mjestu, izuzev u dvorištima i baštama individualnih stambenih objekata za vrijeme vjerskih praznika.

(3) Novčanom kaznom od 400,00 KM do 600,00 KM kaznit će se za prekršaj:

- a) ko se bavi vraćanjem, proricanjem sudbine ili sličnim obmanjivanjem, ili ko objavljuje oglase, propagira ili na drugi način građane poziva ili podstiče da se podvrgnu vraćanju ili proricanju sudbine, ili ko u vraćanju na bilo koji način pomaže licu koje se bavi tim aktivnostima,
- b) ko, u svojstvu posjetioca, unosi alkoholna pića u sportske i kulturne objekte za vrijeme održavanja sportskih, kulturnih i drugih manifestacija,
- c) ko konzumira alkohol na otvorenim prostorima, parkovima, ispred prodavnica i drugim prostorima koji nisu za to predviđeni, ili ko omogućujući da se ispred prodavnice ili drugog poslovnog objekta ili prostora koji nisu za to predviđeni, konzumiraju alkoholna pića,
- d) ko nedozvoljeno koristi javnu površinu bez odobrenja nadležnog organa,
- e) ko prodaje robu ili pruža usluge na javnim površinama bez odobrenja nadležnog organa i bez obzira da li se nalazi u svojstvu trgovca,
- f) ko neovlašteno izvodi radove na instalacijama i provlači nove instalacije u stambenim zgradama za čije je izvođenje potrebno odobrenje i saglasnost nadležnog organa,
- g) ko u svojstvu fizičkog ili pravnog lica poslije izvođenja radova na infrastrukturi, površinu ne dovede u prvobitno stanje,
- h) ko u svojstvu fizičkog ili pravnog lica ometa izvođača radova u izvršavanju svojih obaveza preuzetih ugovorom sklopljenim po okončanju postupka javne nabavke,
- i) ko uznemirava građane pjevanjem, vikanjem, sviranjem, puštanjem muzike ili stvaranjem sličnih izvora buke u stambenim zgradama ili u naseljenim mjestima ili na otvorenom prostoru u vremenu od 16,00 do 18,00 sati i od 22,00 do 07,00 sati narednog dana,
- j) ko uznemirava građane u naseljenim mjestima stvaranjem buke radnim mašinama (cirkulari, motorne pile, bušilice, brusilice i sl.) u vremenu od 16,00 do 18,00 sati i u vremenu od 22,00 do 07,00 sati narednog dana.

- k) Ko vrši izvedbu svečanih manifestacija, priredbi i sličnih muzičkih, festivalskih događaja uz primjenu aparata za pojačavanje zvuka u naselju, na otvorenom prostoru bez odobrenja nadležnog organa,
- l) roditelj, usvojlac, odnosno staralac maloljetnika koji je učinio prekršaj protiv javnog reda i mira propisan ovom Odlukom, ako je izvršenje prekršaja posljedica njegovog propuštanja dužnosti staranja o maloljetniku, a u mogućnosti je da takav nadzor vrši.
- lj) ko u zajedničkim prostorijama stambenih ili drugih zgrada pali vatru,
- m) ko u verbalnom sukobu pljune čovjeka u lice ili u tijelo.

(4) Novčanom kaznom u iznosu od 600,00 KM do 800,00 KM kaznit će se za prekršaj lice koje:

- a) izvodi muziku uživo i upotrebljava uređaje za reprodukciju muzike u ugostiteljskim objektima:
 - u zatvorenom prostoru u ugostiteljskim objektima koji se nalaze u stambeno-poslovnim zgradama i njihovoj neposrednoj blizini, od 22,00 do 06,00 sati, izuzev ugostiteljskih objekata skupina barovi/noćni klub, noćni bar, disko klub-bar, kojima je posebnim propisom dozvoljeno izvođenje muzike uživo i upotreba uređaja za reprodukciju muzike,
 - u baštama ugostiteljskih objekata koji se nalaze u stambeno-poslovnim zgradama ili njihovoj neposrednoj blizini od 22,00 do 06,00 sati, a uz upotrebu pojačala zvuka od 21,00 do 06,00 sati,
 - u ugostiteljskim objektima koji se ne nalaze u stambeno-poslovnim zgradama ili njihovoj neposrednoj blizini u zatvorenim prostorima od 24,00 do 06,00 sati, izuzev ugostiteljskih objekata skupina barovi, a u baštama tih objekata uz upotrebu pojačala zvuka od 22,00 do 06,00 sati,
 - u ugostiteljskim objektima koji se nalaze u neposrednoj blizini škola, zdravstvenih ustanova i vjerskih objekata u periodu od 08,00 do 18,00 sati.
- b) vrši prekoračenje radnog vremena u ugostiteljskim objektima.

(5) Novčanom kaznom od 500,00 KM do 1000,00 KM kaznit će se za prekršaj

- a) ko odlaže ili spaljuje otpad (smeće) i drugi nevegetacijski materijal (guma, plastika i sl.) mimo postavljenih posuda za otpad ili izvan sanitarne deponije otpada Kantona Sarajevo, odnosno na javnim površinama, mjestima ili u postrojenjima za koja nije izdato odobrenje za odlaganje odnosno spaljivanje otpada u skladu sa važećim propisima,
- b) ko ispušta neprijatni miris iz proizvodnih pogona, ugostiteljskih objekata i drugih izvora,
- c) ko u stambeno-poslovnim zgradama ispušta neprijatne mirise u sisteme ventilacije koji nisu predviđeni za te svrhe,
- d) ko u svojstvu fizičkog ili pravnog lica koristi putne kanale uz lokalne i nekatégorisane puteve, ulične

- slivnike (kao uređaje za odvodnju atmosferskih i otpadnih voda) za vođenje kišnice kroz oluke u fekalnu kanalizaciju i uvođenje fekalne kanalizacije u oborinske kanale, rijeke ili potoke,
- e) ko u svojstvu fizičkog ili pravnog lica ispušta u rijeke ili potoke zagađujuće materije i time uništava riblji i biljni fond,
- f) ko u svojstvu fizičkog ili pravnog lica otvorene ili zatvorene slivničke kanale za odvođenje atmosferskih voda premoštava, začeplja, zasipa kao i na svaki drugi način preusmjerava vode cestovnog kanala, bez odobrenja nadležne općinske službe,
- g) ko u svojstvu fizičkog ili pravnog lica izvrši bespravni priključak na komunalnu infrastrukturu (vodovodnu i kanalizacionu mrežu),
- h) ko svojim postupanjem ometa rad službenih lica (redare javnih komunalnih preduzeća, inspektore i druga službena lica u obavljanju njihovih poslova i zadataka).

Član 6.

- (1) Korištenje akustičnih uređaja (za emitovanje muzike i govora) u zatvorenom prostoru i na otvorenom prostoru, regulisano je odredbama člana 18. i 19. Zakona o zaštiti od buke ("Službene novine Kantona Sarajevo", broj 23/16).
- (2) Obaveza investitora - vlasnika ugostiteljskog objekta je da pribavi Stručno mišljenje o zaštiti od buke izdato od strane akreditiranih pravnih lica, akreditiranih laboratorija ili Instituta za akreditiranje.
- (3) Obaveza investitora - vlasnika ugostiteljskog objekta je da se pridržava pribavljenog Stručnog mišljenja o zaštiti od buke izdatog od strane Akreditiranih pravnih lica, kreditiranih laboratorija ili Instituta za akreditiranje.
- (4) Za poslovne prostorije koje se nalaze u stambeno - poslovnoj zgradi kolektivnog stanovanja, za bašte ispred ugostiteljskih objekata i slobodnostojeće otvorene ljetne baste, za korištenje akustičnih uređaja (za emitovanje muzike) u okviru stručnog mišljenja o zaštiti od buke potrebno je da se izvrši ugradnja uređaja elektronskog regulatora - ograničivač nivoa reprodukcije zvuka.

Član 7.

Prekršaji i novčane kazne za pravna i odgovorna lica
Novčanom kaznom od 2.000,00 KM do 6.000,00 KM će se kazniti pravno lice, odnosno novčanom kaznom od 200,00 do 600,00 KM odgovorno lice u pravnom licu, za prekršaje iz člana 5. stav (1) tačka c), stav (3) tačke b), c), d), e) i f) i stava (4) i stav (5).

Član 8.

Prihodi

Prihod ostvaren naplatom novčanih kazni propisanih ovom Odlukom je prihod Budžeta Općine Trnovo.

III - NADZOR

Član 9.

Nadzor i provođenje odredaba Odluke

- (1) Za provođenje odredaba ove Odluke nadležni su:
1. Policijska uprava Hadžići i Trnovo - Policijska stanica Trnovo, i to za počinjene prekršaje iz člana 5. stav 1. tačke a), h), i), j); stav 2 tačke a), b), c), e), f), g), h), i), k), l), lj); stav 3. tačke a), b), c), i), j), k), l), lj), m); stav 4. tačka a), stav 5. tačka h).

2. Općinska komunalna inspekcija i to za počinjene prekršaje iz člana 5. stav 1. tačka a), b), c), d), e), f), h), i), j), k); stav 2. tačke a), f), g), j), k), l), m), n), o); stav 3. tačke d), e), h), k); stav 5. tačka a), b), c), d), e), f), g).
3. Općinska urbanističko-građevinska inspekcija i to za počinjene prekršaje iz člana 5. stav 3. tačke d), f), g); stav 5. tačke c), f), g).
4. Kantonalni inspektorat nadležan za tržišno-turističku inspekciju i to za počinjene prekršaje iz člana 5. stav 1. tačka g), h); stav 3. tačka b); stav 4. tačka b).
5. Kantonalni inspektorat nadležan za inspekciju zaštite okoliša i to za počinjene prekršaje iz člana 5. stav 1. tačka g), i); stav 2. tačke d), f), g), j), k), o), stav 5. tačke a), b), c), d), e).
- (2) Nadzor nad provođenjem odredaba ove Odluke vrši općinski načelnik putem nadležne općinske službe.

Član 10.

Privremeno oduzimanje predmeta

- (1) Kada u vršenju službenih poslova i zadataka saznaju za prekršaj propisan ovom Odlukom, policijski službenici ili inspektori mogu privremeno oduzeti predmete koji su upotrijebljeni ili su bili namijenjeni za izvršenje prekršaja ili koji su nastali izvršenjem prekršaja, kao i predmeta koji mogu poslužiti kao dokaz u prekršajnom postupku.
- (2) O privremenom oduzimanju predmeta policijski službenici ili inspektori licu od koga su predmeti oduzeti izdaju potvrdu koja sadrži: naziv i sjedište organa čiji je policijski službenik ili inspektor oduzeo predmete, naziv, vrstu i količinu oduzetih predmeta, ime i prezime lica od koga su oduzeti predmeti i njegovu adresu, razlog oduzimanja, datum, vrijeme i mjesto oduzimanja, pečat i potpis policijskog službenika ili inspektora.

Član 11.

Postupak sa oduzetim predmetima

Odredbe člana 11. Zakona o prekršajima protiv javnog reda i mira ("Službene novine Kantona Sarajevo", broj 18/07, 7/08 i 34/20) odgovarajuće se primjenjuju i kada je u pitanju postupak za oduzete predmete za prekršaje koji su propisani ovom Odlukom.

IV - ZAVRŠNE ODREDBE

Član 12.

Ravnopravnost spolova

Gramatička terminologija korištenja muškog ili ženskog roda u ovoj Odluci podrazumijeva uključivanje oba roda.

Član 13.

Prestanak primjene važeće Odluke

Danom stupanja na snagu ove Odluke prestaje da važi Odluka o prekršajima protiv javnog reda i mira ("Službene novine Kantona Sarajevo", broj 3/11).

Član 14.

Stupanje na snagu

Ova odluka stupa na snagu danom objave na oglasnoj ploči Općine Trnovo, a naknadno će se objaviti u "Službenim novinama Kantona Sarajevo".

Broj 01-02-547/25
19. februara 2025. godine
Trnovo

Zamjenica predsjedavajućeg
Općinskog vijeća Trnovo
Amina Dedić, s. r.

Odluka je objavljena na oglasnoj ploči dana 19.02.2025. godine.